

COMUNICATO n. 3832 del 20/12/2025

Manà fora su Trentino Tv l program l vegn endrezà dal Comun General de Fascia

## **“Pedies”: en sabeda ai 20 de dezember vegn fora la puntata #517 del program ladin per la television**

[Ladino] Ence chesta setemèna l é a la leta l nef appuntament de “Pedies”, rotocalch ladin de informazion, ruà a la puntata n. 517. I argomenc che vegn portà dant te la puntata de chesta setemèna l é:

La neva telecabina de Ciampedel la aur ofizialmenter i ujes. Do 2 egn de lurieres l nef impiant portamont anter i più inovatives e tecnologics de duta la Èlpes, l é vertech e l tol l post de la veia forenadoa che l’ à regnà 40 egn.

L é n impiant dut nef, l prum de chesta sort te la Tèlia; n sistem a cabines vidà da aparac con technologies e tecniches inovatives. La gran neva l é la capacità de portèda de la jent; l é stat calcolà che se passerà da 900 persones a l’ ora a 2.200 e chest l permetarà de smendrèr debel l dejèje de la gran coudes, sibie dadoman per jir en su, che ence da sera per vegnir deretorn. L investment l é dassen gran, più avisa entorn i 60 milions de euro: na operazion che aboncont, apede al inom de Ciampedel, la porta luster e nonzech ence a duta Fascia.

I augures de don Mario Bravin a duta la comunanza de Fascia. Descheche se sa, da chest uton en ca don Mario l é l curat de duta la parochies de la val, da Soraga a Penìa. En vea de la festes ormai vejines donca, nosc piovan l ne porta dant n pensier sul Nadèl, olache l ne recorda che enceben che sarà dis de gran lurier e segur aron duc n muie da fèr, l è semper de valuta se recordèr di valores leé al stèr dessema, al stèr coi più picioi e co la persones soules, se binèr con chi de cèsa e se fèr i augures.

L ne recorda ence che zacan la cripela la vegnia fata te stua, belimpont per tor dant l bambin tel post più emportant de duta la cèsa.

La conditora Asia Corradi, che ja da vèlch an en cà la laora per l Hotel Dolomia de Soraga, la ne porta dant la rezeta de n douc per da Nadèl coi perfumes de la festes. Più avisa: i brownie a la ciocolata, con toron, mandarin e zabaion.

E con chest douc ence la Redazion de Pedies la ge sport i augures de Bon Nadèl e Bona Festes a duc si spetadores.

I reports de chesta setemèna i é stac enjigné e porté dant da Angela Pederiva e Riccardo Zanoner.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su **Trentino Tv – canal 10 Prov. de TN**- vigni sabeda da les 18.00 (sie da sera), de domenìa da les 13.30 (mesa la does domesdi) e de lunesc da les 11.30 (mesa les doudesc).

L program ades l va fora ence sun **AltoAdige TV – canal 11 de BZ** - vigni domenìa da les 18.00 (sie da sera).

Se pel veder duta la puntates ence sul canal YouTube de TV Ladina sot chest link:

<https://www.youtube.com/@TvLadina>

opuramenter se pel veder i servijes un a un su la piata Facebook de TV Ladina

<https://www.facebook.com/TelevijionLadina>

**Traduzion di Servijes Linguistics e Culturèi del Comun general de Fascia**

(cdt)